

दिनांक : 02.03.2026

समय : 18.45 बजे

- केंद्र सरकार मध्य-पूर्व मांय बधती तणा-तणी ने ध्यान राखता थकां राज्यां ने परामर्श जारी कर र सावधानी राखण बाबत् कह्यो
- प्रधानमंत्री नरेन्द्र मोदी काल 'एमएसएमई उद्यमां रा बारा मांय खास वेबिनार ने संबोधित करेलां
- रंगां रा त्यौहार होळी रा उमाव बीचे प्रदेश मांय आज आधी रात ने होळी मंगळी जावेला-काल अर 4 मार्च ने रंग खेल्यो जावेलां
- प्रदेश रा न्यारा-न्यारा शहरां मांय दिन री बगत पारो एक ऊँ साढे 7 डिग्री सेल्सियस ताई चढ्यो

000

केंद्र सरकार आतूणी एशिया मांय उपजा हालात ने ध्यान राखता थकां सगळा राज्यां अर केन्द्र रा राज वाळा प्रदेशां सारू हिफाजत ऊँ जुडी राय जारी कीनी हैं गृह मंत्रालय कानून-व्यवस्था बणायी राखण सारू राज्यां ने कागद लिख र सावचेत रहवण अर भडकाऊ भाषण देवण वाळां माथे करडी निजर राखण रा हुकम दीना हैं प्रधानमंत्री नरेन्द्र मोदी ई आतंकवाद, उग्रवाद अर कट्टरपंथ ने इंसानियत सारू गंभीर चुनौती बताता थकां कह्यो है के दुनिया मांय शांति अर थरता बणायी राखण सारू न्यारा-न्यारा देशां बीचे आपसी मदद घणी जरूरी हैं

000

हवाई कंपनी एयर इंडिया मध्य पूर्व रा मौजूदा हालात ने ध्यान राखता थकां नुवी ट्रैवल एडवाइजरी जारी कीनी हैं कंपनी रे मुजब संयुक्त अरब अमीरात, सऊदी अरब, इस्राइल अर कतर जावण सारू सगळी उड़ानां आज ई नी जावेलां ई सागे ई दिल्ली अर अमृतसर ऊँ यूरोप ओडी जावण वाळी कुछ उड़ानां टाळ दीरीजी हैं एयरलाइन रे मुजब उत्तरी अमेरिका अर यूरोप ओडी जावण वाळी दूजी उड़ानां अब दूजा गोला ऊँ जावेला, ज्यीं कारण सफर रा टेम मांय बधोतरी व्हे सके हैं

000

प्रधानमंत्री नरेंद्र मोदी काल संवारे 11.00 बज्यां 'एमएसएमई विकास के अगुआ' मुद्दा माथे व्हेवण वाळी वेबिनार ने सम्बोधित करेलां ई वेबिनार मांय प्रधानमंत्री खास तौर ऊँ बजट मांय करी ज्या ऐलाण अर एमएसएमई ने देश रा विकास रा इंजन मांय बदळण रा रोडमैप रा बारा मांय चर्चा करेलां

000

राष्ट्रपति द्रौपदी मुर्मू आज दिल्ली मांय महिलावां ने समर्पित चार योजनावां सारू कीनीं आं मांय लखपति बिटिया योजना, सहेली पिक स्मार्ट कार्ड, मेरी पूंजी-मेरा अधिकार अर मुफ्त एल.पी.जी. सिलेंडर योजना शामिल हैं ई मौके राष्ट्रपति महिलावां ने मजबूत बणावण ऊँ जुडी केई योजनावां रो जिक कीनीं

राष्ट्रपति मुर्मू कह्यो के महिलावां समाज रो अटूट हिस्सो हैं वे कह्यो के महिलावां रो मान करण अर वां ने मजबूत बणावणो सभ्य देश री सांची पिछाण हैं श्रीमती मुर्मू कह्यो के आज देश की बेटियां हर क्षेत्र में भारत का नाम रोशन कर रही हैं

000

प्रदेश रा उन्नीस ज़िलां मांय संगठित अपराधियां रे खिलाफ पुलिस खास अभियान चलायो हैं ई रा तैत एक हजार दो सौ छिहत्तर आरोपितां री पिछाण कर र वां मांय ऊँ 2 सौ 14 ने गिरफ्तार करी ज्या हैं पकडी ज्या आरोपितां मांय लॉरेंस अर गोदारा सरीखा खास गिरोहां ऊँ जुड्या लोग ई शामिल हैं कार्यवाही रे दौरान पुलिस सत्रह पिस्तौलां, मोटी तादाद मांय कारतूस अर नशीली चीजां ज़ब्त कीनीं हनुमानगढ़ ज़िला मांय पंजाब रा बंबीहा गिरोह रा सदस्यां ऊँ ग्यारह पिस्तौलां बरामद करी ज्यी जद के झुंझुनू मांय अमल रा गैर कानूनी तौर ऊँ उगायी ज्या आठ हजार ऊँ बत्ता पौधा पकडी ज्यां

000

मुख्यमंत्री भजनलाल शर्मा जनता ने होळी री शुभकामनावां दीनी हैं वे आज जयपुर रा भांकरोटा मांय सांगांनेर विधानसभा हलका रा होळी मिलन समारोह मांय भाईचारा रो संदेश देता थकां कह्यो के ओ त्यौहार सगळां री जिन्दगी मांय खुशियां लावेलां वे प्रधानमंत्री नरेन्द्र मोदी रा हाल ही मांय व्ह्या अजमेर दौरा रो जिक्र करता थकां कह्यो के केंद्र सरकार प्रदेश रा विकास सारू मोटी सौगातां दीनी हैं श्री शर्मा खास तौर ऊँ टाबरियां ने कैंसर ऊँ बचावण सारू टीका लगावण रा अभियान रो जिक्र करता थकां इण ने महिला स्वास्थ्य अर सुरक्षा री दिशा मांय मोटो कदम बतायों

000

आज आधी रात होळी मंगळी जावेला ज्यीं पाछे राज्य रा न्यारा-न्यारा हलकां रा रीति रिवाज ने मुजब काल अर 04 मार्च ने रंग-गुलाल ऊँ धुलण्डी रो त्यौहार मनायो जावेलां होळी रा त्यौहार ने देखता थकां प्रदेश भर रा बाजारां मांय ज़ोरदार रौनक है अर खरीददारी रो दौर ज़ोरा ऊँ चाल रह्यो हैं राजधानी जयपुर रा आराध्य देव गोविंददेवजी मंदिर मांय आज होळी मंगळबा ऊँ पैली फूल अर गुलाल ऊँ होळी रो खास कार्यक्रम राख्यो जा रह्यो हैं शेखावाटी हलका मांय चंग अर ढफ री थाप सागे फाग गीतां री धूम मच्योडी हैं ब्रज हलका रा करौली, डीग अर भरतपुर मांय ई होळी रा खास रंग निजर आ रह्या हैं डीग मांय प्रसिद्ध लट्टमार होळी खेली जा रही हैं भरतपुर मांय खिरनी घाट रा भोलेश्वर मंदिर मांय बरसाना री होळी री भांत केसरिया लड्डुमार होळी रो कार्यक्रम राख्यी ज्यीं म्हाणा करौली खबरनवीस बतायो के वठे रा मदन मोहन जी मिन्दर मांय ई वृन्दावन रा रंग, भक्ति अर संस्कृति रो नज़ारो निजर आ रह्यो है -

.....

बारां ज़िला रा किशनगंज मांय फूलडोल उत्सव आज सरू व्ह्यो पाली ज़िला रा गांवांई हलकां मांय गेर नाच रा कार्यक्रम राख्या जा रह्या हैं त्यौहार ने ध्यान राखता थकां हिफाजत अर स्वास्थ्य री निजर ऊँ प्रशासन पूरी तरह सावचेत हैं पाली रा राजकीय बांगड़ अस्पताल समेत राज्य रा खास अस्पतालां मांय 72 घंटा रो अलर्ट जारी करी ज्यो है अर वठे डॉक्टरां री खास टीम अर एम्बुलेंस तैयार राख्यी जावेलां चूरू ज़िला रा रतनगढ़ मांय कलाकार भांत-भांत रा रूप धर र होळी री बनौळी निकालीं

000

कोटा रा कैथून मांय काल विभीषण मेळो सरू व्हेलां कार्यक्रम री सरूआत राती जगा सागे व्हेलां 4 मार्च ने विभीषण धर्मशाला ऊँ शोभायात्रा निकाली जावेला जिन मांय घुड़सवार, बॅड अर देवविमान शामिल रहवेलां वां ई सिंज्यां साढे सात बज्यां हिरण्यकश्यप रो 70 फुट ऊंचो पुतळो फूंक्यो जावेलां मेळा मांय विभीषण रा राज्याभिषेक रा कार्यक्रम ई व्हेलां ई सागे ई 5 ऊँ 8 मार्च तांई पशु मेला मैदान मांय रासलीला अर सांस्कृतिक कार्यक्रम राख्या जावेलां

000

बांसवाड़ा रा कुशलबाग मैदान मांय चाल रह्या सरस राजसखी मेळा मांय जनजातीय अर गांवांई हलकां री महिलावां कानी ऊँ बणायी ज्या सामान री प्रदर्शनी लगायी ज्यी हैं इण मांय खुद सेवक समूहां ऊँ जुड़ी महिलावां कानी ऊँ बणायी ज्या आंवाला कैंडी, पापड़, जैविक खाद, साबुन अर मसालां सरीखा सामान री खरीदी करी जा सके हैं राजसखी मेळा री प्रभारी नुरुल्लाह दानिश बतायो के मेळा मांय लगायी ज्यी स्टॉलां माथे डिजिटल तरीका ऊँ ई चुकारो कर्यो जा सके हैं

000

राज्य मांय न्यारी-न्यारी ठौड़ा दिन री बगत तापमान मांय एक ऊँ साढे 7 डिग्री सेल्सियस तांई री बधोतरी दर्ज करी ज्यी हैं मौसम विभाग रे मुजब लारला 24 घंटां मांय बाड़मेर मांय सब ऊँ बत्तो साढे 36 दशमलव 5 डिग्री सेल्सियस तापमान दर्ज करी ज्यीं सीकर ज़िला रा फतेहपुर अर जोधपुर मांय पारो 35 डिग्री सेल्सियस ने पार कर ग्यो ई बीचे प्रदेश मांय आवता एक सप्ताह मांय मौसम सामान्यतः साफ रहवण रा आसार हैं मौसम केंद्र जयपुर रा निदेशक राधेश्याम शर्मा बतायो के बाड़मेर अर आरे-सारे रा हलकां मांय आवता दो-तीन दिन मांय पारो 38 ऊँ 40 डिग्री सेल्सियस तांई पूगण रा आसार हैं

000

देशभर मांय मनाया जा रह्या जनऔषधि सप्ताह रा तैत जांच शिविर लगाया जा रह्या हैं ई रा तैत जनता ने किफायती अर गुणवत्ता वाळी जेनेरिक दवाइयां रा बारा मांय जाणकारी दी जा रही हैं ई दौरान देशभर मांय अढाई सौ ऊँ बत्ती ठौड़ां लगाया जा रह्या स्वास्थ्य जांच शिविरां मांय मुफ्त स्वास्थ्य जांच सागे ब्लड प्रेशर अर थायरॉइड री जांच ई करी जा रही है अर जनऔषधियां दी जा

रही हैं प्रधानमंत्री भारतीय जनऔषधि परियोजना—पीएमबीजेपी रा तैत, देशभर मांय 18 हजार ऊं बत्ता जन औषधि केंद्र चलाया जा रह्या हैं सरकार आवता साल ताईं आं री तादाद बधा र 25 हज़ार करणों तैय कीनो हैं

000